

REGLUGERÐ

um upplýsingagjöf um farþega og áhöfn.

1. gr.

Gildissvið.

Reglugerð þessi gildir um afhendingu upplýsinga um farþega og áhöfn fara í millilandaferðum, þ.e. fara sem fara frá landinu til útlanda og fara sem koma til landsins frá útlöndum.

Með upplýsingum um farþega og áhöfn í reglugerðinni er í meginatriðum átt við upplýsingar sem finna má í farþegabókunargögnum (PNR) og upplýsingar úr vegabréfi farþega (API). Upplýsingarnar eru nánar skilgreindar í viðauka við reglugerðina.

2. gr.

Afhendingarskylda.

Skylda til afhendingar upplýsinga samkvæmt reglugerðinni hvílir á eftirfarandi aðilum:

- Fyrirtækjum sem annast flutning farþega og/eða vöru til og frá landinu,
- stjórnendum fara sem ferðast til og frá landinu,
- eigendum fara sem ferðast til og frá landinu og
- umráðamönnum fara sem ferðast til og frá landinu.

Afhendingarskyldan er óháð gerð þess fars sem nýtt er í millilandaferðum og nær m.a. til einkaflugvéla og seglskipa.

3. gr.

Afhending.

Upplýsingarnar skulu afhentar tollstjóra.

Afhenda ber upplýsingarnar með rafrænum hætti í rafrænt móttökukerfi tollstjóra á því formi og sniði sem tollstjóri ákveður.

Í sérstökum tilvikum, með samþykki tollstjóra, skal afhenda upplýsingarnar rafrænt með öðrum hætti en í rafrænt móttökukerfi tollstjóra eða skriflega.

Upplýsingarnar skulu veittar óumbeðið fyrir hverja ferð til eða frá tollsvæði ríkisins í öllum eftirfarandi tilvikum:

- 24-48 klukkustundum fyrir áætlaða brottför.
- Strax eftir að dyr fars hafa lokast (það er eftir að farþegar hafa stigið um borð í þeim tilgangi að ferðast og ekki er lengur mögulegt fyrir farþega að fara um borð eða frá borði).
- Samkvæmt beiðni.

Afhendingarskyldir aðilar skv. 2. gr. geta, í stað þess að afhenda upplýsingar í samræmi við 2. tölul. 4. mgr., afhent upplýsingar skv. viðauka 1 jafnóðum, þannig að afhentar upplýsingar í samræmi við lið 1. tölul. 4. mgr. uppfærast í hvert skipti sem breyting verður á þeim.

4. gr.

Meðhöndlun upplýsinga.

Upplýsingar skv. viðauka skulu geymdar í rafrænu móttökukerfi tollstjóra. Upplýsingarnar má geyma í allt að fimm ár frá móttöku þeirra. Eftir tvö ár frá móttöku upplýsinganna skulu þeir hlutar þeirra sem varpað geta ljósi á persónuauðkenni dulkóðaðir. Eftir að tveggja ára tímabilinu líkur er aðeins heimilt að fá aðgang að öllum upplýsingunum í viðauka þegar það er talið nauðsynlegt í tilteknu máli vegna gruns um alvarlegt brot og í því skyni að koma í veg fyrir það brot, koma upp um það og til rannsóknar og saksóknar. Einnig er heimilt að fá aðgang að öllum upplýsingum í viðauka skv. úrskurði dómara, eftir að tveggja ára tímabilinu lýkur. Eftir fimm ár frá móttöku upplýsinganna skal þeim eytt. Framangreindir frestir eiga ekki við þegar upplýsingarnar eru notaðar í sakamáli.

5. gr.

Upplýsingaskipti.

Tollstjóra, lögreglu og öðrum handhöfum lögregluvalds, er heimilt að skiptast á upplýsingum um farþega og áhöfn í þágu eftirlits, greiningarstarfs eða vegna rannsókna á ætluðum brotum gegn ákvæðum tollalaga og ákvæðum annarra laga. Framangreindum aðilum er í sama tilgangi heimilt að skiptast á upplýsingum um farþega og áhöfn við erlenda handhafa tollgæslu- og lögregluvalds.

Miðlun farþegaupplýsinga milli tollstjóra, lögreglu og annarra handhafa lögregluvalds skal fara fram í gegnum það rafræna kerfi sem móttækur farþegaupplýsingar eða með öðrum öruggum hætti. Miðlun farþegaupplýsinga milli framangreindra aðila og erlendra handhafa lögregluvalds skal fara fram með öruggum hætti, t.d. í gegnum þá gagnagrunna sem alþjóðlegar löggæslustofnanir hafa sett á stofn í þeim tilgangi að deila upplýsingum með öruggum hætti.

6. gr.

Gildistaka.

Reglugerð þessi, sem er sett samkvæmt heimild 3. mgr. 51. gr. a. tollalaga, nr. 88/2005, öðlast þegar gildi.

Fjármála- og efnahagsráðuneytinu, xxx

f.h. fjármála- og efnahagsráðherra

xxx

xxx

Viðauki.

Afhendingarskyldar upplýsingar:

1. PNR-númer.
2. Dagsetning pöntunar/útgáfu miða.
3. Dagsetning fyrirhugaðs ferðalags.
4. Nafn/nöfn farþega.
5. Heimilisfang, sími og netfang miðakaupanda og ferðamanna.
6. Upplýsingar um greiðslu fyrir farmiða, m.a. heimilisfang greiðanda miða.
7. Upplýsingar um skipulag ferðar fyrir hvert PNR-númer.
8. Vildarklúbbsupplýsingar (e. frequent flyer information).
9. Upplýsingar um ferðaskrifstofu sem annast ferðaskipulagningu.
10. Ferðastaða farþega, þ.m.t. staðfestingar, innskráning, mæting eða ekki (e. no show/go show).
11. Skiptar farþegaupplýsingar (þ.e. þegar í PNR-upplýsingum farþega er vísað til PNR-upplýsinga annars farþega, (e. Passenger Name Record).
12. Almennar athugasemdir, þ.m.t. allar tiltækar upplýsingar um börn án fylgdar undir 18 ára aldri, s.s. nafn, kyn, aldur, tungumál, upplýsingar um forráðamann á brottfararstað og tengsl hans við barnið, upplýsingar um forráðamann á komustað og tengsl hans við barnið og upplýsingar um hvaða ferðaskrifstofa heldur utan um brottför og komu.
13. Upplýsingar um farmiða, m.a. númer, útgáfudagsetning, hvort miðinn gildir aðra leiðina eða báðar og sjálfvirk verðvísibending (e. Automated Ticket Fare Quote).
14. Sætisnúmer í fari og aðrar upplýsingar um sæti.
15. Upplýsingar um sameiginlegt flugnúmer (e. code share information).
16. Allar upplýsingar um farangur ferðamanna.
17. Fjöldi samferðamanna og nöfn þeirra.
18. Allar API-upplýsingar sem flugfélagið safnar (e. Advance Passenger Information).
19. Allar breytingar sem verða á upplýsingum sem taldar eru upp í liðum 1–18.

Fyrirtækjum, sem flytja ökutæki tilheyrandi farþegum til og frá landinu, ber auk þess að veita eftirfarandi upplýsingar, séu ökutækin ekki á farmskrá:

1. Upplýsingar um ökutæki um borð (VEH), s.s. flokk, tegund og undirtegund, hvaða farþega ökutækið tilheyrir, í hvaða tilgangi ökutækið kemur til landsins, lit ökutækis og komu- og brottfarardag.
2. Upplýsingar um innflytjanda ökutækis, s.s. nafn, heimilisfang, símanúmer, netfang sem og sömu upplýsingar um skráðan eiganda ökutækis, sé hann annar en innflytjandi.
3. Skráningarmerki ökutækis.
4. Fjöldi ökutækja um borð.
5. Verksmiðjunúmer ökutækis.